

先代舊事本紀卷第七

天皇本紀

神武天皇。

彥波瀲武鸕鷀草葺不合尊第四皇子也。諱·神日本磐余彥天皇，亦云·彥火火出見尊，即少年時號·狹野尊也。母曰·玉依姬，海童之少女也。天皇生而明達，意確如也。

年十五，立為太子。

長而娶日向國吾田邑吾平津媛為妃。

生，手研耳命也。

太歲甲寅冬十月，丁巳朔辛酉，親帥諸皇子，發自西宮，船師東征。見天孫紀。

己未年春二月，辛卯朔庚辰，道臣命率軍兵而撥伏逆賊之狀奏矣。

戊午，宇摩志麻治命率天物部而翳夷逆賊，復帥軍兵而平定海內狀奏矣。

三月，辛酉朔丁卯，下令曰：「自我東征，於茲六年矣。賴以皇天之威，凶徒就戮。雖邊土未清，餘妖尚梗，而中洲之地無復風塵。誠宜恢廓皇都，規模大壯。而今運屬屯蒙，民心朴素，巢栖穴住，習俗惟常。夫大人立制，義必隨時。苟有利民，何妨聖造。且當披拂山林，經營宮室而恭臨寶位，以鎮元元。上則答乾靈授國之德，下則弘皇孫養正之心。然後兼六合以開都，掩八紘而為宇，不亦可乎！觀夫畝傍山東南樞原地者，蓋國之奧區乎。」

庚辰，詔有司經始帝宅。

天太玉命孫·天富命，率手置帆負·彥挾智二神之孫，以齋斧·齋鉏，始探山材，構立正殿。故所謂，於畝傍之樞原也。太立宮柱於底磐根，峻峙搏風於高天之原，而始馭天下之天皇，草創天基之日也。因皇孫命之瑞御殿造供奉矣。

其裔孫·忌部所居，紀伊國名草御木·麤香二鄉。其採材忌部所居，謂之御木造。造殿忌部所居，謂之麤香。是其緣也。古語，正殿謂·麤香。自天太玉命以下至此，按古語拾遺之文。

庚申年秋八月，癸丑朔戊辰，天皇當立正妃，改廣求華胄。

時有人奏之曰：「事代主神與三島溝檝神之女·玉櫛媛所生兒，號曰·媛蹈鞬五十鈴姬命。是國色之秀者。」天皇悅之。九月，壬午朔乙巳，納媛蹈鞬五十鈴姬命為正妃。

辛酉為元年。春正月，庚辰朔，都樞原宮，肇即皇位。尊正妃·媛蹈鞬五十鈴姬命，立為皇后。則大三輪大神女也。蓋作孫女乎。

宇摩志麻治命奉獻天瑞寶，乃豎神楯以齋，亦立今木，亦五十櫛刺繞於布都主劍大神，崇齋殿內，藏于十寶，以待近宿。因號·足尼，其足尼之號，從此而始矣。

天富命率諸忌部，捧天璽鏡劍，奉安正殿。天種子命奏天神壽詞，即神世古事類是也。宇摩志麻治命率內物部，乃豎矛楯，嚴增威儀也。道臣命率來目部，護衛宮門，掌其開闔矣。並令四方之國以觀天位之貴，亦俾率土之民以示朝廷之重者也。于時，皇子·太夫，率群官·臣·連·伴造·國造等，元正朝賀禮拜也。凡厥即位·賀正·建都·踐祚等事，並發此時矣。下段據古語拾遺之文。

復仰從皇天二祖詔，建樹神籬矣。復所謂高皇產靈·神皇產靈·魂留產靈·生產靈·足產靈·大宮賣神·事代主神·御膳神，今御巫齋祭矣。復櫛磐間戶神·豐磐間戶神，並今御門御巫所奉齋矣。復生島是八大洲之靈，今生島御巫齋祀矣。復坐摩是大宮地之靈，今坐摩御巫齋祭矣。

復天富命率齋部諸氏，作種種神寶·鏡·玉·矛·楯·木棉·麻等也。復櫛明玉命孫，造御祈玉。古語·美保伎玉，是謂祈禱矣。古語拾遺云，櫛明玉命之孫，造御祈玉。其裔今在出雲國。式云，出雲國所進御富岐玉六十運。復天日鷲命孫，造木綿及麻並織布矣。古語云·荒妙也。復天富命率天日鷲命之孫，分遣肥饒地，播殖穀麻矣。復天富命更求沃壤地，分殖好麻木綿，永奉麻大嘗會緣。復天富命於安房地，立太玉命社。謂·安房社是也。

復手置帆負命孫，造矛竿。今讚岐地永貢八百竿之緣也。復天兒屋命孫·天種子命，解除天罪·國罪之事也。復日臣命率來目部，護衛宮門，掌其開闔。復饒速日命兒·宇摩志麻治命，帥內物部，造備矛楯。復天富命率諸齋部，捧天璽鏡劍，奉安正殿矣。復懸瓊玉，陳幣物而祭大殿。貞觀儀式云，大殿祭神，今食大嘗會等前後必有此祭。延喜式云，忌部像巽申祝開畢懸玉殿四角，次祭宮門矣。復天富命，陳幣祝詞，禋祀皇天，偏秩群望，以答神祇之恩矣。復命中臣·齋部二氏，俱掌祠祀之儀者矣。復命猿女君氏，供神樂矣。自餘諸氏，各有其職矣。

帝與神其際未遠，同殿共床，以此為恒。故神物·官物，亦未分別矣。復宮內立藏，號曰·齋藏，令齋部氏永任其職矣。

十一月，丙子朔庚寅，宇摩志麻治命奉齋殿內於天璽瑞寶。奉為帝后崇鎮御魂，祈禱壽祚。所謂御鎮魂祭，自此而始矣。凡厥天瑞，謂宇摩志麻治命先考·饒速日尊，自天受來天璽瑞寶十種是矣。所謂·瀛都鏡，一·邊都鏡，一·八握劍，一·生玉，一·死反玉，一·足玉，一·道反玉，一·蛇比禮，一·蜂比禮，一·品物比禮，一，是也。天神教導：「若有痛處者，令茲十寶謂：『一，二，三，四，五，六，七，八，九，十。』而布瑠部，由良由良止布瑠部，如此為之者，死人返生矣。」即是『布瑠之言』本矣。所謂御鎮魂祭，是其緣矣。其鎮魂祭日者，猿女君等率百歌女，舉其言本而神樂歌儻，尤其是其言者矣。

二年春二月，甲辰朔乙巳，天皇定功行賞。

詔宇摩志麻治命曰：「汝之勳功矣，念惟大功也。公之忠節焉思維至忠也。因斯先授神靈之劍，崇酬不世之勳。今配股肱

之職,永傳不貳之美.生世世子子孫孫八十聯綿,必胤此職,永為龜鏡。」則字摩志麻治命・天日方奇日方命,俱拜為申食國政大夫.其申食國政大夫者,今之大連,亦云-大臣也.但天日方奇日方命者,皇后之兄,大神君祖也.

詔道臣命曰:「汝忠且勇,能有導之功,因先改日臣以為道臣.加之帥大來目督將元戎,奉承密策,傳能以諷歌・倒語,掃蕩妖氣,如此功能,為軍將流傳後裔。」其倒語之用,始發此時.即大伴連等祖矣.復道臣宅地,居于築坂邑,以優寵矣.復使大來目居于畝傍山以西川邊之地.今號-來目邑,即此其緣,謂久米連祖也.

詔椎根津彥曰:「汝迎引皇舟,表續香山之巔,因譽為-倭國造。」其國造者,自此而始矣.此則大倭連等祖也.

詔弟磯城-黑速曰:「汝有兄磯城逆賊之機首奏之勇,因裔為磯城縣主矣。」

詔頭八咫鳥曰:「汝有導皇師之功,因入賞例。」其裔孫者,葛野縣主部是也.宜參姓氏錄,賀茂縣祖條.

四年春二月,壬戌朔甲申,天皇御安正殿,詔曰:「我皇祖之靈矣,自天降鑑,光助朕躬.今,諸虜已平,海內無事.可以郊祀天神,用申大孝者矣!」乃立靈疇於鳥見山中,其地號曰-上小野榛原・下小野榛原,用祭皇祖天神焉.

于時,據日本書紀,時值神武三十一年夏四月,乙酉朔.皇輿巡幸,因登腋上嗛間丘而迴望國狀曰:「妍哉,平國獲矣!雖內木綿之真迹國,猶蜻蛉之聲吐焉.聲吐,交構也。」由是始有秋津洲之號矣.

昔伊奘諾尊目此國曰:「此國曰-日本,浦安・細戈千足國・磯輪上秀真國矣.蓋謂日本者,心安之國,利器多出之國,麗美整然之國也。」

復大己貴神目之曰:「玉牆內國。」

復饒速日命乘天磐船而翔行大虛也,睨是鄉而降之.故,因目之曰:「虛空見日本國是歟。」

四十有二年春正月,壬子朔甲寅,立皇子-神渟名川耳尊為皇太子.

七十有六年春三月,甲午朔甲辰,天皇崩于橿原宮.時年一百二十七歲也.

明年秋九月,乙卯朔丙寅,葬畝傍山東北陵.

神武天皇子四處.

兒,手研耳命.無後.

次,神八井耳命.意保臣・島田臣・雀部造等祖.

次,神渟名川耳尊.即天皇位.

次,彥八井耳命.茨田連等祖.

綏靖天皇.

神日本磐余彥天皇第三子,諱-神渟名川耳天皇,諡曰-綏靖天皇.母曰-媛蹈鞬五十鈴媛命,事代主神大女也.

天皇風姿岐嶷,少有雄拔之氣.及壯容貌魁偉,武藝過人而志向沈毅.

至四十八歲,神日本磐余彥天皇崩.神渟名川耳尊孝性純深,悲慕無已.特留心於喪葬之事焉.其庶兄手研耳命行年已長,久歷朝機.故亦委事而親之.

然,其王立操厝懷,本乖仁義,遂以諒闇之際,威福自由,苞藏禍心,圖害二弟.于時也,太歲己卯.

冬十一月,神渟名川耳尊與兄-神八井耳命,陰知其志而善防之.至於山陵事畢,乃使弓部-稚彥,造弓;倭鍛部-天津真浦,造真麿鏃;矢部,作箭.

及弓矢既成,神渟名川耳尊欲以射殺手研耳命.會有手研耳命於片丘大窖中,獨臥于大床.時神渟名川耳尊謂神八井耳命曰:「今適其時也!夫,言貴密,事宜慎.故,我之陰謀,本無預者.今日之事,唯吾與爾自行之耳.吾當先開窖戶,爾其射之!」因相隨進入,神渟名川耳尊突開其戶,神八井耳命則手腳戰慄,不能放矢.

時神渟名川耳尊,掣取其兄所持弓矢而射手研耳命.一發中胸,二發中背,遂殺之.

於是神八井耳命慙然自服,讓於神渟名川耳尊曰:「吾是乃兄而懦弱不能致果,汝特挺神武,自誅元惡.宜哉乎!汝之光臨天位以承皇祖之業,吾當為汝輔之,奉典神祇者。」即多臣始祖也.神名帳云,大和國十市郡多坐彌志理都比古神社二座.

元年庚辰春正月,壬申朔己卯,神渟名川耳尊即天皇位.都葛城,是謂高丘宮.

尊皇后曰-皇太后.

二年,立五十鈴依媛為皇后,即天皇之姨也.

皇后生,磯城津彥玉手看天皇也.

三年春正月,宇摩志麻治命之兒-彥湯支命,為申食國政大夫也.

四年夏四月,神八井耳命薨.葬于畝傍山.

二十五年,立皇子-磯城津彥玉手看尊為太子.年二十一.

三十三年夏五月,天皇不豫.

癸酉,崩.

十月,奉葬於倭桃花島田丘上陵.

太子,磯城津彥玉手看尊.

安寧天皇.

神渟名川耳天皇太子-磯城津彥玉手看尊,母曰-五十鈴依媛命,事代主神之少女也.

綏靖天皇二十五年,立為皇太子,年二十一.

三十三年,神渟名川耳天皇崩。

元年癸丑,皇太子尊即天皇位.尊皇后曰-皇太后.

二年,遷都片鹽,是謂浮穴宮.

三年春正月,以渟名底中媛命,立為皇后.誕生三皇子.

即,息石耳命.

次,日本彥耜友尊.

次,磯城津彥命也.按地祇本紀,當三作四.加手研彥其友背命.但古事記・日本紀以此命為懿德天皇御子.

四年夏十月,以出雲色命為申食國政大夫也.復以大禰命為侍臣.並宇摩志麻治命之孫也.

十一年春正月,以日本彥耜友皇子,立為皇太子.

三十八年十二月,天皇崩.

明年八月,葬於畝傍山南御陰井上陵.

誕生皇子四柱.

兄,息石耳命.亦云.常津彥命.無後.常津彥者,古事記作-常根津日子伊呂泥命.

次,日本彥耜友尊.

次,磯城津彥命也.豬使連等祖・新田部等祖.

次,手研彥奇友背命.父勢別等祖.

懿德天皇.

磯城津彥玉手看天皇太子-日本彥耜友尊,第二子.母曰-皇后-渟名底中媛命,事代主神孫-鴨王女也.

安寧天皇十一年,立為皇太子.年十六.

三十八年十二月,天皇崩.

元年辛卯春二月,己酉朔壬子,太子尊即天皇位.

九月,尊皇后曰-皇太后.

二年春正月,都遷輕地,是謂-曲峽宮.

二月,天豐津媛命,立為皇后.

誕生,觀松彥香殖稻命.

三月,申食國政大夫-出雲色命為大臣.

二十二年春二月,丁未朔戊午,觀松彥香殖稻尊,立為皇太子.年十八.

三十四年秋九月,天皇崩.

明年冬十月,葬於畝傍山南織沙溪上陵.

誕生,皇太子-觀松彥香殖稻尊.

次,武彥奇友背命.無後.

孝照天皇.照,書紀作-昭.

諱-觀松彥香殖稻尊者,磯城津彥玉手看天皇太子也.書紀作-懿德天皇太子.母曰-皇后-天豐津媛命,息石耳命之女也.

元年春正月,丙戌朔甲午,皇太子尊,即天皇位.

夏四月,尊皇后曰-皇太后.

秋七月,都遷掖上,謂-池心宮.宇摩志麻治命後-出石心命為大臣也.

二十九年春正月,世襲足姬命,立為皇后.

誕生二皇子,天足彥國押人命.

次,日本足彥國押人尊也.

三十一年春正月,瀛津世襲命為大臣.天孫本紀作-大連.

六十八年春正月,日本足彥國押人命,立為皇太子.年二十.

八十三年,天皇崩.

明年八月,葬於腋上博多山上陵.

誕生皇子二柱.

兄,天足彥國押人命.大春日臣等祖.

次,日本足彥國押人尊.

孝安天皇.

諱-日本足彥國押人尊者,觀松彥香殖稻天皇第二子也.母曰-皇后-世襲足姬命,大臣-瀛津世襲命之妹.尾張氏.

元年己丑春正月,皇太子尊,即天皇位。
八月,尊皇后為-皇太后。
二年十月,都遷室地,謂-秋津島宮。

三年八月,宇摩志麻治命裔孫-六見命・三見命,並為足尼,次為宿禰。
二十六年,立姪-押媛為皇后。
誕生,大日本根子彥太瓊命。

七十六年,大日本根子彥太瓊尊,立為皇太子,年二十六。
百二年春正月,天皇崩。
秋九月,葬於玉手丘上陵。
誕生,大日本根子彥太瓊尊。

孝靈天皇。

諱-大日本根子彥太瓊尊者,日本足彥國押人天皇太子也,母曰-皇后押媛命。
元年辛未春正月,皇太子尊,即天皇位,尊皇后為-皇太后。
二年二月,立細媛命為皇后,誕生皇子一柱。
兒,大日本根子彥國牽皇子命等,等字疑衍文。

妃,倭國香媛,亦名-絙某姊,誕生三皇子。

兒,倭跡跡日百襲姬命。
次,彥五十狹芹彥命,亦名,吉備津彥命。
次,倭跡跡稚屋姬命。

妃,絙某弟,誕生三皇子。

兒,彥狹島命。
次,稚五彥命。
次,弟稚五彥命。

三年春正月,宇摩志麻治命裔孫-大水口命・大矢口命,並為宿禰。

三十六年春正月,彥國牽皇子,立為太子,年十九。

七十六年春二月,天皇崩。

後帝四年,葬於片岡馬坂陵。

誕生五皇子。

兒,大日本根子彥國牽尊。
次,彥五十狹芹彥命,亦名-吉備津彥命,吉備臣等祖。
次,彥狹島命,海直等祖。
次,稚五彥命,字自可臣等祖。
次,弟稚五彥命,蓋誤解書紀之詞乎。

孝元天皇。

諱-大日本根子彥國牽皇太子尊者,大日本根子彥太瓊天皇太子也,母曰-皇后-細媛命,磯城縣主大目之女也。

元年丁亥春正月,太子尊,即天皇位,尊皇后為-皇太后。

四年春三月,都遷輕地,謂-境原宮。

七年春二月,鬱色謎命立為皇后,誕生二男一女。

兒,大彥命。
次,稚日本根子彥大日日尊。
次,倭跡跡姬命。

妃,伊香色謎命。

誕生,彥太忍信命。

次妃,河內青玉繫女-埴安姬。

生,武埴安彥命。

八年春正月,物部連公祖宇摩志麻治命裔孫-鬱色雄命為大臣,亦太綜杵命為大禰。

二月,尊皇后曰-皇太后,皇太后追贈-太皇太后。

二十二年正月,稚日本根子彥大日日命,立為皇太子,年十六。

五十七年秋九月,天皇崩。

後帝六年,葬於劍池島上陵,書紀作五年。

誕生四男一女。

兒,大彥命.阿倍臣・高橋臣祖等.
次,稚日本根子彥大日日尊.
次,彥太忍信命.紀臣等祖.
次,武埴安彥命.岡屋臣等祖.
次,倭跡跡姬命.伊勢齋祠.

開化天皇.

諱-稚日本根子彥大日日尊者,大日本根子彥國牽天皇第二子也.母曰-鬱色謎命,物部連公祖-出石心命孫也.按書紀,穗積臣遠祖-鬱色雄命之妹也.

元年癸未春二月,皇太子尊,即天皇位.元年至七年條,記年異於書紀.

二年春正月,尊皇后曰-皇太后.尊皇太后,追贈-太皇太后.

冬十月,都遷春日地,謂-率川宮.

七年春正月,伊香色謎命立為皇后.是庶母也.

誕生,御間城入彥五十瓊殖命也.

先,天皇納丹波竹野媛為妃.

生,產湯產隅命.

次,妃和邇臣遠祖-姥津命之妹-姥津姬.

生,彥坐王.

八年春正月,以大禰大綜杵命為大臣.武建命・大峰命,並為大禰.

二月,伊香色雄命為大臣.並物部連公遠祖-宇摩志麻治命孫.

二十八年春正月,御間城入彥命,立為太子.年十九.

六十年夏四月,天皇崩.

十月,葬於春日率川坂本陵.亦云-坂上.時年百十五歲.具上文可作百十一乎.

誕生四皇子.

兒,御間城入彥五十瓊殖尊.瓊殖,或本作-狹茅.

次,彥坐王.當麻坂上君等祖.

次,彥蔣箕命.品治部君等祖-產湯產隅命.

次,武齒類命.道守臣等祖.

崇神天皇.

諱-御間城入彥五十瓊殖尊者,稚日本根子大日日天皇第二皇子也.母曰-皇后-伊香色謎命,物部氏遠祖-大綜杵命女也.

天皇年十九歲,立為皇太子.識性聰敏,幼好雄略.既壯,寬博謹慎,崇重神祇,恒有經綸天業之心焉.

六十年夏四月,稚日本根子大日日天皇崩.

元年歲次甲申春正月,壬午朔甲午,皇太子尊即天皇位.尊皇后曰-皇太后.尊皇太后,追贈-太皇太后.

二月,辛亥朔丙寅,御間城入姬命立為皇后.

先是,皇后誕生-活目入彥五十狹茅天皇.

次,彥五十狹茅命.

次,國方姬命.

次,千千衝倭姬命.

次,倭彥命.

次,五十日鶴彥命也.

妃,紀伊國荒河戶畔女-遠津年魚眼眼妙媛.

生,豐城入彥命.

次,豐鍬入姬命也.

次妃,尾張-大海媛.

生,八坂入彥命.

次,淳中城入姬命.

次,十市瓊入姬命也.

三年秋九月,都遷磯城.謂-瑞籬宮.

四年春二月,甲子朔丁卯,建膽心命為大禰.多辨命為宿禰.安毛建美命為侍臣.並物部連公祖也.

四十八年春正月,己卯朔戊子,天皇敕豐城命・活目尊曰:「汝等二子慈愛俱齊,不知,何為嗣.各宜夢,朕以夢占之.」二皇子於是被命,沐浴而祈寐,各得夢也.

會明,兄-豐城命以夢辭奏于天皇曰:「自登三諸山,向東而八迴弄槍八迴擊刀.」弟-活目尊以夢辭奏言:「自登三諸山之嶺,繩緩四方,逐食粟雀.」則天皇相夢,謂二子曰:「兄則一片向東,當治東國;弟是悉臨四方,宜繼朕位!」

夏四月,戊申朔丙寅,以活目尊立為皇太子.以豐城命,令治東.神名帳云,下野國河內郡二荒山神社.按神社考,豐城入彥命之祠也.

六十年春二月,詔群臣曰:「武日照命從天將來神寶,藏于出雲大神宮。」則遣矢田部造遠祖-武諸隅命,使分明檢定獻奏焉。此條,日本紀作-秋七月。

六十五年春正月,武諸隅命為大連。物部氏祖。

六十八年冬十二月,戊申朔壬子,天皇崩。時年百二十歲也。

明年秋八月,甲辰朔甲寅,葬于山邊道上陵。

誕生皇子六男五女。

兒,活目入彥五十狹茅尊。

次,彥五十狹茅命。

次,國方姬命。

次,千千衝倭姬命。

次,倭彥命。

次,五十日鶴彥命。

次,豐城入彥命。

次,豐鍬入姬命。始託天照大神為齋祠。

次,八坂入彥命。

次,淳中城入姬命。初託天國魂神為齋祭。

次,十市瓊入姬命。

垂仁天皇。

諱-活目入彥五十狹茅尊者,御間城入彥五十瓊殖天皇第三子也。母曰-皇后-御間城入姬,即大彥皇子命之女也。

天皇二十九年歲次壬子春正月,己亥朔,生於瑞籬宮。生而有岐嶷之姿。及壯,個儻大度,率性任真,無所矯飾。天皇愛之,引置左右。

二十四歲,因夢祥,立為皇太子焉。

六十八年冬十二月,御間城入彥五十瓊殖天皇崩。

元年歲次壬辰春正月,丁丑朔戊寅,皇太子尊即天皇位。

尊皇后曰-皇太后。尊皇太后曰-太皇太后。

二年春二月,辛未朔己卯,狹穗姬命立為皇后。

誕生,譽津別命。生而天皇愛之,常在左右,及壯而不言。

冬十月,更都遷纏向,謂-珠城宮。

四年秋九月,丙戌朔戊申,皇后母兄-狹穗彥王謀反,欲危社稷。其記在別。

五年冬十月,己卯朔,狹穗彥與妹皇后共死于城中。

十五年春二月,乙卯朔甲子,喚丹波五女納於掖庭矣。第一曰,日葉酢姬;次,淳葉田瓊入姬;次,真砥野媛;次,薊瓊入姬;次,竹野媛。並開化天皇兒-彥坐皇子命子-丹波道主王子也。

秋八月,壬午朔,日葉酢媛命立為皇后。復,淳葉田瓊入媛・真砥野媛・薊瓊入媛,並為皇妃。

唯竹野媛者,因形姿醜,返於本土。則羞其見返,到葛野地,自輿墮死。故號其地謂-墮國。今謂-乙訓者,訛矣。皇后。

誕生,五十瓊敷入彥命。

次,大足彥尊。

次,大中姬命。

次,倭姬命。

次,稚城瓊入彥命。

妃,淳葉田瓊入媛。

生,鐸石別命。

次,膽香足姬命。

次妃,真砥野媛。

生,磐撞別命。

次,祖別命。

次妃,薊瓊入媛。

生,池速別命。

次,五十速石別命。

次,五十日足彥命。

二十三年秋八月,丙申朔己亥,大新河命為大臣。十市根命為五大夫一。並宇摩志麻治命裔孫也。

丁巳,大臣-大新河命,賜-物部連公姓,即改大臣號-大連。

九月,丙寅朔丁卯,詔群卿曰:「譽津別王是生年既三十,髯鬚八掬,猶泣如兒,常不言,何由矣?因有司而議矣。」

冬十月,乙丑朔壬申,天皇立於大殿前,譽津別王子侍之。時有鳴鶴度大虛。王子仰觀鶴曰:「是何物耶?」天皇則知王子見鶴得言而喜之,詔左右曰:「誰能捕是鳥獻之?」於是鳥取造祖-天湯河板舉奏曰:「臣必捕而獻!」即天皇敕湯河板舉曰:「汝獻是鳥,必敦賞矣。」湯河板舉遠望鶴飛之方,追尋詣出雲而捕獲。或曰,得于但馬國矣。

十一月,甲午朔己未,湯河板舉獻鶴也。譽津別命弄是鶴,遂得言語。此條書己未,廿六日也。日本紀作乙未,二日也。不知孰是。

是以敦賞湯河板舉,則賜姓而號-鳥取造。亦定-鳥取部・鳥養部・譽津部。

三十年春正月,己未朔甲子,天皇詔五十瓊敷命・大足彥尊曰:「汝等各言情願之物也!」

兄王諡:「欲得弓矢!」弟王諡:「欲得皇位!」於是天皇詔之曰:「各宜隨情!」則弓矢賜五十瓊敷命,仍詔大足彥尊曰:「汝必繼朕位矣。」

三十二年秋七月,甲戌朔己卯,皇后日葉酢媛命薨。

三十七年春正月,戊寅朔,大足彥命立為皇太子。

八十一年春二月,壬辰朔,五大夫一十市根命,賜姓-物部連公.即為大連。

九十九年秋七月,乙巳朔戊午,天皇崩於纏向宮,時年百四十歲。

冬十二月,癸卯朔壬子,葬於菅原伏見陵。

所生皇子十男三女。

兄,譽津別命,鳥取造等祖。

次,五十瓊敷入彥命。

次,日本大足彥忍代別尊。

次,大中姬命。

次,倭姬命,天照太神齋祠,初啟齋宮。

次,稚城瓊入彥命。

次,鐸石別命。

次,膽香足姬命。

次,磐撞別命,三尾君等祖。

次,祖別命。

次,池速別命。

次,五十速日別命。

次,五十日足彥命。

景行天皇。

諱-大足彥忍代別尊者,活日入彥五十狹茅天皇第三子也。母曰-皇后-日葉洲媛命,丹波道主王之女也。

元年歲次辛未秋七月,皇太子尊即天皇位。尊皇后曰-皇太后。尊皇太后追贈-太皇太后。

二年二月,播磨稻日大郎姬立為皇后,誕生三男。此條,日本紀作三月。

第一,大碓命。

次,小碓命。

次,稚倭根子命矣。

其一・二皇子,一日同胞雙生。天皇異之,則誥於碓。故曰,大碓・小碓。小碓尊,幼有雄略之氣。及壯,容貌魁偉,身長一丈,力能扛鼎焉。

四年,天皇幸美濃國。左右奏言:「此國有佳人,曰-弟媛。容姿端正,八坂入彥皇子之女也。」

天皇欲入為妃,幸弟媛家。聞乘輿車駕,則隱竹林矣。天皇權令弟媛至而居于泳宮。萬葉集云-三野之國之高北之八十一隣之宮。鯉魚浮池,臨視而戲遊。時弟媛欲見鯉遊,密來臨池,天皇則通之矣。弟媛以為,夫婦之道,古今達則也。然於吾而不便,則請天皇曰:「妾性不欲交接之道。今不勝皇命之威,暫納帷幕之中。然意所不快,亦形姿穢陋,久之不堪陪於掖庭。唯有妾姊,名曰-八坂入姬。容姿美麗,志亦貞潔,宜納後宮。」

天皇聽之,仍喚八坂入媛為妃,生七男六女皇子。

第一,稚足彥。

次,五百城入彥。

次,忍足別。

次,稚倭根子。

次,大酢別。

次,五十狹城入彥。

次,吉備兄彥。

次,淳熨斗姬。

次,淳名城姬。

次,五百城入姬。

次,麿依姬。

次,高城入媛。

次,弟姬。

次妃,三尾氏磐城別之妹-水齒郎媛。

生,五百野皇女。

次妃,五十河媛。

生,神櫛皇子。

次,稻背入彥皇子。

次妃,阿倍氏木事之女-高田媛。

生,武國凝別皇子。

次妃,日向髮長大田根。

生,日向襲津彥皇子。

次妃,襲武媛。

生,國乳別皇子與國凝別皇子.
次,國背別皇子,亦名-宮道別皇子.
次,豐戶別皇子.
次妃,佳人曰-御刀媛.
生,豐國別皇子.

冬十一月,都於纏向,謂-日代宮.
天皇聞美濃國造名-神骨之女,兄遠子・弟遠子,並有國色,則遣大碓命,使察其婦女之容姿,時大碓命,便密通而不復命,由是恨大碓命.
十二年秋七月,熊襲反之,不朝.
八月,幸筑紫,巡伐諸國不從命者.

十三年,於日向國有佳人,曰-御刀媛,即為妃.
生,豐國別皇子.
二十年春二月,辛巳朔甲申,遣五百野皇女,令祭天照大神.
冬十月,遣日本武尊,令擊熊襲,時年十六歲,按日本紀,當作二十七年.
三十六年八月,大臣-物部膽咋宿禰女-五十琴姬命為妃.
生,五十功彥命.
五十一年春正月,壬午朔戊子,招群卿而宴數日矣.
時皇子稚足彥尊・武內宿禰不參赴于宴庭之,天皇即問其故,因以奏曰:「夫宴樂之日,群卿・百寮,必情在戲遊,不存國家,若有狂生,而伺牆闕之際乎?故侍門下,備非常,」時天皇詔曰:「灼然!」則異寵之焉.
秋八月,稚足彥命立為皇太子,年二十四,命武內宿禰,為棟梁之臣.
初天皇與武內宿禰同日生之,固有異寵焉.

日本武尊平東夷,還參未參,薨於尾張國矣,按日本武尊薨於伊勢國能褒野,陵式云,能褒野墓,在伊勢國鈴鹿郡.
初娶,兩道入姬皇女為妃.
生,道依別王.
次,足仲彥尊.
次,布忍入姬命.
次,稚武王.
又,吉備武彥女-吉備穴戶武媛為妃.
生,武卯王與石城別王.
又,穗積氏忍山宿禰女-弟橘媛.
生,稚武彥王.

五十二年夏五月,甲辰朔辛未,皇后-播磨太郎姬薨.
秋七月,八坂入媛命立為皇后.
五十八年春二月,辛丑朔辛亥,幸近江國,居志賀三歲,是謂-高穴穗宮.
六十年冬十一月,乙酉朔辛卯,天皇崩於高穴穗宮,時年百六歲.
後帝二年,葬於山邊道上陵.

夫天皇所生,男女總八十一皇子之中,男五十五,女二十六,就中際留六皇子,男五女一,以外皆封州縣矣,皇子五十,皇女二十五,合七十五,各封州縣,不入國史.

稚倭根子命.
大酢別命.
吉備兄彥命.
武國凝別命,筑紫水間君主.
神櫛別命,讚岐國造祖.
稻背入彥命,播磨別祖.
豐國別命,喜備別祖.
國背別命,水間君祖.
忍足別命.
日向襲津彥命,奄智君祖.
國乳別命,伊與宇和合別祖.
豐門入彥命,大田別祖.
五十狹城入彥命,三河長谷部直祖.
稚屋彥命.
彥人大兄命.
武國皇別命,伊奧御城別・添御杖君祖.
真稚彥命.
天帶根命,目鯉部君祖.
大曾色別命.
五十河彥命,讚岐直・五十河別祖.
石社別命.

大稻背別命.御杖君祖.

武押別命.

豐門別命.三島水間君・奄智首・壯子首・粟首・筑紫火別君祖.

不知來入彥命.

曾能目別命.

十市入彥命.

襲小橋別命.兔田小橋別祖.

色己焦別命.

熊津彥命.

昔前彥人大兄水城命.奄智白幣造祖.

熊忍津彥命.日向穴穗別祖.

櫛見皇命.讚岐國造祖.

武弟別命.立知備別祖.

草木命.日向君祖.

稚根子皇子命.

兄彥命.大分穴穗御埼別・海部直・三野之宇泥須別等祖.

宮道別命.

手事別命.

大我門別命.

豐日別命.

三川宿禰命.

豐手別命.

倭宿禰命.三川大伴部直祖.

豐津彥命.

五百木根命.

弟別命.牟宜都君祖.

大焦別命.

五十功彥命.伊勢刑部君・三川三保君祖.

櫛角別命.茨田連祖.

定皇子六之中,男五女一.

兒,大碓命.守君等祖.

次,小碓命.追號-日本武尊.

次,豐國別命.日向諸縣君等祖.

次,稚足彥尊.

次,五百城入彥女命.

次,五百野姬皇女命.伊勢天照大神齋祠.

以上五十皇子.其二十五,不在入限.

成務天皇.

諱-稚足彥尊者,大足彥忍代別天皇第四皇子也.母皇后-八坂入姬命,即八坂入彥皇子之子女也.

大足彥天皇四十六年,立為太子.年二十四.

六十年冬十一月,大足彥天皇崩.

元年歲次辛未春正月,甲申朔戊子,皇太子尊即天皇位.尊皇后曰-皇太后.尊皇太后追贈-太皇太后.物部膽咋宿禰為太臣也.都志賀高穴穗宮.

二年冬十一月,癸酉朔壬午,葬於大足彥天皇於倭國山邊道上陵.

三年春正月,癸酉朔己卯,以武內宿禰為大臣也.

四十八年春三月,庚辰朔,朔足仲彥尊立為皇太子.大足彥天皇皇子-日本武尊第二皇子也.

日本武尊娶兩道入姬皇女為妃,生三男一女.

兒,稻依別王.犬上君・武部君等祖.

次,足仲彥尊.

次,布忍入姬命.

次,稚武王.近江建部君祖・宮道君等祖.

妃,吉備武彥女-吉備穴戶武姬,生二男.

兒,武卵王.讚岐陵君等祖.

次,十城別王.伊豫別君等祖.

妃,穗積氏祖-忍山宿禰女-橘媛,生九男.

兒,稚武彥王命.尾津君・揮田君・武部君等祖.

次,稻入別命.

次,武養蠶命.波多臣等祖.

次,葦娶齧見別命.竈口君等祖.

次,息長田別命.阿波君等祖.

次,五十目彥王命.讚岐君等祖.

次,伊賀彥王.

次,五田王.尾張國丹羽建部君等祖.

次,佐伯命.參川御史連等祖.然,按姓氏錄參河國御史連,景行皇子氣入彥命之後也,與此紀異.
凡王子十五之中,十四男王,一女王.

六十年夏六月,己巳朔己卯,天皇崩.年百七歲.

仲哀天皇.

大足彥天皇第二皇子-童名小碓命-日本武尊.第二王子,足仲彥王尊諱名也.母曰-兩道入姬皇女,活目入彥天皇皇女也.天皇容姿端正,身長十尺.成務天皇無胤,故四十八年,立為太子.年三十一.

元年歲次壬申春正月,庚寅朔庚子,太子尊即天皇位.尊母皇后曰-皇太后.尊皇太后追贈太皇太后.

氣長足姬尊立為皇后.開化天皇兒-彥坐皇子命兒-山代大筒城真若王兒-迦爾米雷王兒-息長宿禰女-氣長足姬命是.
息長地名在近江國坂田郡. 詔群臣曰:「朕未逮弱冠而父王既崩之,乃神靈化白鳥而上天.仰望之情,一日勿息.是以冀獲白鳥,養之於陵域之池.因以視其鳥,欲慰顧情!」則令諸國,俾貢白鳥.此則天皇戀父王而將養狎鳥.而弟-蒲見別王云:「雖云白鳥,而燒為黑鳥!」云矣.天皇惡其不孝,遣兵誅戮矣.

先娶,叔父-彥人大兄之-大中姬為妃,誕生二兒.

麿坂皇子・忍熊皇子也.

次娶,天熊田造祖-大酒主女-弟姬為妃,生一兒.

譽屋別皇子也.

二月,幸角鹿.即興行宮而居之,是謂-筭飯宮.

三月,巡狩南國.將討熊襲叛.

七月,皇后泊坐豐浦津.而后得如意珠於海中.

九月,興宮室于穴門而居之.是謂-穴門豐浦宮.

八年春正月,天皇幸筑紫.討熊襲之議矣.

時有神,託皇后誨曰:「天皇何憂熊襲之不服?此國膾肉之空國也.西有寶國,謂-新羅國也.若能祭我者,必令自服。」云云.而天皇西稱無國,不信神教誨.猶親擊熊襲,中賊矢也.

九年春二月,癸卯朔丁未,武內大臣勸進,天皇親后自彈琴.託問皇后,不肯託誨.于時託云:「皇后妊胎皇子可得寶國。」云云.武內大臣慙進天皇,祇令彈琴.祈請神名.于時日暮將燈,琴音絕聲.乃舉火見之,天皇忽有痛身,而明日崩.于時,年五十二.即知不信神教而中賊矢早崩之矣.

于時皇后・大臣,匿天皇之喪,不令知天下.

則皇后詔大臣及中臣-烏賊津連・大三輪-太友主君・物部-膽咋連・大伴-武以連・物部-多遲麻連曰:「今天下未知天皇之崩.若百姓知之,有懈怠者乎!」即命曰:「大夫領百寮,令守宮中.竊收天皇屍,付武內宿禰,以從海路遷於穴門,而殯于豐浦宮.」

甲子,武內宿禰自穴門還之,復奏於皇后.

是年,由新羅國役,不得葬天皇矣.

所生皇子四柱.

麿坂皇子.

忍熊皇子.

譽屋別皇子.

譽田別尊.

神功皇后.

氣長足姬尊者,稚日本根子彥大日日天皇之曾孫,氣長宿禰王之女也.母曰-葛城高穎媛也.

仲哀天皇二年,立為皇后.幼而聰明,貌容壯麗.父王異焉.

九年春二月,足仲彥天皇崩於筑紫檜冰宮.

皇后傷天皇不從神教而早崩之事,以為,知其神名.則令群臣・百寮,以解罪改過,更造齋殿乃託.皇后祈請先託神名等事,具在別記.

十月,己亥朔辛丑,神祇荒神奉齋別船,亦以和魂齋皇后船.帥領船師,從和珥津解纜進發.幸新羅國,狀具在征服三韓記.

十二月,戊戌朔辛亥,皇后歸自新羅.則誕生譽田天皇於筑紫.故時人號其產處曰-宇瀨也.

明年春二月,皇后領群卿及百寮,遷穴門豐浦宮.即收天皇之喪,從海路以向京.

時麿坂王・忍熊王聞天皇崩,亦皇后西征,并皇子新生,而密謀之曰:「今皇后有子,群臣皆從焉,必共議之立幼主.吾等何以兄從弟乎?」乃詳為天皇作陵,詣播磨興山陵於赤石.

仍編船繼于淡路島,運其島石而造之.則每人令取兵,而待皇后.

於是,犬上君遠祖-倉見別與吉師祖-五十狹茅宿禰,共隸于麿坂王.因以為將軍,令興東國兵.

時麿坂王・忍熊王,聞天皇喪,亦皇后征西并皇子新生,而密謀之曰:「今皇后有子,群臣皆從焉,必共議之立幼王矣.吾等何以兄從弟乎云?」設兵待敵,並從誅斬云云之事,具在別記.

元年冬十月,癸亥朔甲子,群臣尊皇后曰-皇太后.太歲辛巳改為攝政元年.
物部多遲麻連公為大連.

二年冬十一月,丁亥朔甲午,葬天皇於河內國長野陵.

三年春正月,丙戌朔戊子,譽田別皇子立為皇太子.都於磐余.謂-稚櫻宮.物部五十琴宿禰為大連.

六十九年夏四月,辛酉朔丁丑,皇太后崩於稚櫻宮.

冬十月,戊午朔壬申,葬狹城楯列陵.

是日,追尊皇太后曰-氣長足姬尊.

先代舊事本紀卷第七 終

[\[久遠の絆\]](#) [\[卷六\]](#) [\[卷八\]](#) [\[再臨詔\]](#)